



# PORTAVÓS VI GOVERN KONSTITUSIONÁL



KOMUNIKADU  
BA MEDIA

Loron 28 fulan-maiu tinan 2015  
Dili, Timor-Leste

## Loron 100 Governu Konstitutionál VI nian Serbisu ho Rigór no Responsabilidade

Iha tersa ne'e, loron 26 fulan-maiu, Governu Konstitutionál VI marka loron ukun nian ba da-100. Loron 100 ne'ebé karaterizadu ho ezekutivu ida ne'ebé forte, ne'ebé motivadu husi kompromisu ne'ebé forte atu halo asaun. Primeiru-Ministru, Dr. Rui Maria de Araújo, deklara katak "Governu ne'e hala'o nafatin serbisu ho rigór no responsabilidade."

Iha períodu badak ida ne'e nia laran, Governu fó ona ekipamentu ba eskola sira no kontinua fó formasaun ba profesór rihun ba rihun kona-ba curríkulu eskolár foun. Kuidadu Saúde Primáriu sira hahú implementa ona iha sentru no postu saúde nian sira hotu, ho atensaun espesiál ba-ihā área Saúde Familiár nian.

Atu hadi'a sidadaun sira-nia asesu ba servisu báziku sira ne'ebé importante, maka halo ona estrada no ponte sira ho kualidade di'ak no kontinua iha melloria iha distribuisaun pública eletrisidade nian, no asesu ba bee moos no saneamento báziku. Governu hahú investe liután iha setór agrícola, atu Timor-Leste bele hetan autonomia alimentár no hasa'e tan rendimentu no loke serbisu iha zona rurál sira. Hahú ona projeto irrigasaun nian foun sira, no loke tan ona sentru formasaun agrícola nian no disponibiliza ona mós rekursu práktika agrícola nian sira.

Aleinde preparasaun Estrutura Orgánika foun Governu nian, Programa Governu Konstitutionál VI no Orsamentu Retifikativu ba tinan 2015, Governu halo ona reforma iha sistema finanseiru, lejizlativu no administrativu. Reforma sira ne'e atu garante ezekusaun orsamentu ida ne'ebé aas hahú tiha ona, no fó atensaun liu-liu ba planeamentu, orsamentasaun, ezekusaun no akompañamentu no avaliaasaun kona-ba despeza sira.

Tanba responsabilizasaun sai henesan prioridade ne'ebé boot, mak iha loron 4 fulan-juñu, sei publika relatório ida kona-ba atividade sira ne'ebé mak Governu Konstitutionál VI hala'o ona iha ninia mandatu loron 100 dahuluk.

Portavós Governu Konstitutionál VI nian, Ministru Estadu Agio Pereira hateten katak "loron 100 dahuluk ne'e nu'udar períodu ida ho asaun ne'ebé mak notável tebes. Ida ne'e hanesan inísiu ida de'it husi buat ne'ebé Governu hakarak alkansa iha ninia mandatu tinan rua hobalu nia laran ne'e, tanba kontinua envolve komunidade no servisu hamutuk ho rigór no responsabilidade hodi serbí povu Timor-Leste nian". **REMATA**



Agio Pereira  
+670 7723 0011  
[agio.pereira@cdm.gov.tl](mailto:agio.pereira@cdm.gov.tl)  
[govtmedia@gmail.com](mailto:govtmedia@gmail.com)  
[www.timor-leste.gov.tl](http://www.timor-leste.gov.tl)